

Kalata gwa búbili ugwa Paúli ku Bakolinti Isyakulongosya

Kalata ujú, Paúli aabasimbiile aBakilisiti aba bali mu Kolinti. Kaali kaaja kanywamu nkiisú ikya mu Akaja mBúgiliki. Aasimbile bo aali kifuki ukubendela. Kalata ujú aali gwa kubakasya, paapo jo ujú aalyandi- isye ikipanga kya Kyala ikya mu Kolinti. Bo akaali ukusimba kalata ujú, kunyuma aabendela nú kubatumila baakalata, leelo bwalipo ubutolwe ubwa kulegana ndwitiko nkipanga ikyo. Po alinkusimba kalata ujú, ukubatwala ukutendekesya bo akaali ukufika ku Kolinti.

Sikunangisya ukuti aBakilisiti bamo baatigi Paúli akaabombelaga kanunu indalama sya kipanga, kangi baatigi akaja ntumigwa gwa nalooli. Po mwa kalata ujú ikulingaania ukuti umwene jo jwani, kangi ikulingaania isya mbombo ijaa kulumbilila indumi inunu, iji Kyala aalinkooliile ukulumbila. Kangi ikubamanyisya abiitiki ukubombela indalama syabo, ukubatwala aBakilisiti ni fipanga fyosa ifya Kyala.

Isi silimo mwa kalata uju
Pauli ikubaponia aBakolinti nu kugwa ulupi kwa Kyala
Pauli ikwinokesya ulubaatiko lwake nu kulingaania imbom
Ukubasangulila abiiitiki abaa ku Jelusalemu
Pauli ikubalingaania ukuti umwene ntumigwa gwa Jesu Kil
Isya kumaliikisya ukubasoka

Uluponio

¹ Kalata uju afumile kumyangu une Pauli, ne ntumigwa gwa Kilisiti Jesu, ku bwigane bwa Kyala. Une nu gwamyitu ndwitiko Timoti tukubasimbila umwe mwe baa nkipanga kya Kyala iki kili mu Kolinti, pamopeene na biitiki boosa aba bali nkiisu ikya mu Akaja.

² Hiipyana nu lutengaano ukufuma kwa Taata Kyala na ku Ntwa Jesu Kilisiti, fijege na nuumwe.

Ulusuubisyo lwa Kyala mbutolwe

³ Atuufigwege Kyala, uGwise gwa Ntwa gwitu Jesu Kilisiti, Taata ugwu kibabiilisi, kangi jo Kyala uju ikutusuubisya ndi syosa.

⁴ Umwene ikutusuubisya mbutolwe bwitu boosa, ukuti na nuuswe tubasuubisyege abangi aba bali mbutolwe, ukwendela ndusuubisyo lula ulu atupeele Kyala uswe. ⁵ Po leelo,

bo ulu Kyala ikongelapo ubuliilanisi ubu tuli nabo mu ngubilo sya Kilisiti, bo lululo ikongelapo ukutusuubisya ukwendela mwa Kilisiti. ⁶ Nalinga tukukubilwa, tukukubilwa ukuti umwe mukabe ulusuubisyo nu bupoki. Kangi bo tukusuubisigwa, tukusuubisigwa ukuti umwe mukabe ulusuubisyo. Uluusuubisyo ulu

lukubapela ukuumiilila mu ngubilo silasila, isi na nuuswe tukukubilwa. ⁷ Ubusubilo lwitu kumyinu lukulumba, paapo tumeenye ukuti muli baliilanisi mu ngubilo syitu, kangi muli baliilanisi ndusubisyo lwitu.

⁸ Baamyitu ndwitiko, tukulonda mumanye muno twakabiile ingubilo ingali, bo tali nkiisu ikya Asija. Ingubilo isi syatwagile syatwilikiile fiijo, twinogonaga ukuti tukuja pakufwa. ⁹ Nalooli twali bo ulwa banda aba balongiigwe ukugogigwa. Leelo ilyo lyaboniike, ukuti tuleke ukusubila amaka giitu jujuswe, looli tunsuubilege Kyala uju ikubasyusa abafwe. ¹⁰ Umwene jo uju aatupokile bo tali mbutolwe ubwa kufwa, kangi ikwendelelaga ukutupoka. Uswa tukusubila umwene ukuti ikubombaga bo ulo akabalilo koosa, ¹¹ ku njila jinu ukututula, mu nyiipuuto syinu kwa Kyala. Po Kyala aikupilika inyiipuuto syinu, nu kutupa isajo inyingi. Po abandwa bingi aabikunngwila ulupi.

Pauli ikwandula ulubaatiko lwake ulwa kubuka ku Kolinti

¹² Po tukwituufya ndi ili, tukwibona mu ndumbula syitu ukuti pakiisu apa, fiijo kumyinu, twatugeele ku bugolofu, kangi ni ndumbula inyeelu ukufuma kwa Kyala, kisita busyobi. Tukaasubilaga amahala giitu jujuswe, looli ipyana lya Kyala. ¹³⁻¹⁴ Ndi ilyo tutikubasimbila amasyu amakafu, looli aga mubagiile ukubala nu kugaagania kanunu. Akabalilo aka mutwageenie panandi, ngusubila ukuti iisiku limo aamukwisa kusyagania syosa. Po iisiku ili ikwisa

kugomoka uNtwa Jesu, mukwisa kwituukifyaga mmyitu, bo ulu uswe tukwituukifya mmyinu.

¹⁵ Paapo naameenye ukuti mukwituukifya mmyitu, naalondaga ukutala ukwisa kumyinu, ukuti muhobokeye fiiyo kunongwa jaa kwisa une ulwa bubili. ¹⁶ Naabaatiike ukwenda kumyinu bo ngubuka nkiisu ikya mu Make-tonija, nu kugomokelako kangi kumyinu, ukuti umwe mumbepo ubutuuli ubwa njila jangu ijaa kubuka nkiisu ikya Jutai. ¹⁷ Po bo nandwile ulubaatiko lwangu ulwa kwisa kumyinu, bule, mukwinogona ukuti ngwanduka anduka? Pamo mukwinogona ukuti une ngulongosigwa nu bwigane bwangu, ukuti ndigi, "Eena," po kangi akabalilo kakaako ndigi, "Himma!"

¹⁸ Looli bo ulu Kyala gwa bwanalooli, isi twababulile sitikwanduka anduka, ukuti, "Eena," po kangi ukuti, "Himma." ¹⁹ Namanga uMwana gwa Kyala,* Jesu Kilisiti, akaali mundu gwa kongania amasyu, ukuti atigi, "Eena," po kangi atigi, "Himma." Looli umwene akabalilo koosa jo, "Eena." Umwene jo ujū une, Sila na Timoti twalimfunwisye kumyinu. ²⁰ Umwene jo, "Eena," ugwa kunangisya isi aafingile Kyala. Jo nongwa iji mwa Jesu Kilisiti tukuti, "Ameni," ukuntuufya Kyala. ²¹ Kyala jo ujū ikutakasya uswe na nuumwe, kangi atusungwile ukujā biitiki baa Kilisiti, ²² atubikile ikikolekelo, kokuti abikile pamyitu ikimanyilo ikya kunangisya ukuti tuli bandu baake. ikikolekelo ikyo jo Mbepo Mwikemo ujū

* **1:19** 1:19 uMwana gwa Kyala Bala ku Isyakalingaania.

Kyala ammbiikile mu ndumbula syitu, ukuti tumanye kisita kwilaamwa, ukuti isi afingile aasikuboneka.

Pauli akaagomokiileko ku Kolinti

²³ Ngaaliisile kangi kumyinu, uko ku Kolinti, paapo ngaalondaga ukubafulasya mu ndumbula syinu. Isi ngujoba sya nalooli, Kyala nkeeti gwangu. ²⁴ Ndikuti tuli balagili baa lwitiko lwinu, looli tukwikasya ukuya baliilanisi na nuumwe, ukuti tuje nu lusekelo. Namanga umwe muli na maka ndwitiko.

2

¹ Po naatumwile mu ndumbula jangu, ukuti ndikwisako kangi kumyinu, ndingabafulasya indumbula syinu. ² Paapo linga une ngubapela umwe ukuya nu busulumanie, kokuti akajako ugwa kumbela une ukuya nu lusekelo, looli jujumwe mwe mbafuleesye mu ndumbula syinu! ³ Fyobeene naabasimbiile mwa kalata jula ujungi, paapo ngaalondaga ukwisa kumyinu, ukuti ndingafulasigwa mu ndumbula jangu na bandu aba baalondigwaga ukuhobosya. Naameenye ukuti une linga ndi nu lusekelo, na nuumwe aamukuya nu lusekelo. ⁴ Naabasimbiile kalata ku busulumanie ubukulumba, ubutolwe na maasosi. Ngaabingiliile ukubafulasya mu ndumbula syinu, looli ukuti mumanye muno mbaganiile fiijo.

Ulhobokelo ku ntulanongwa

5 Po leelo, umundu pakati pamyinu uju aaliifuleesye fiijo, akaaliifuleesye niimwene, looli abafuleesye umwe mwesa. Leelo ndikulonda ukukindilila ukujoba isyo. 6 Ufundu ulu akabile ukufuma ku bandu bingi, lumfwene. 7 Po kununu ukunhobokela nu kunkasya umundu ujo, ukuti alingasulumania fiijo nu konyoka amaka. 8 Ngubapyelesya mujobe pabwelu ukuti mukaali munnganile. 9 Fyobeene naabasimbiile kalata jula ukubapima, ukuti mmanyene linga mukumbilika ndi syosa. 10 Linga mukunhobokela umundu ujo, na niine ngunhobokelaga. Linga silipo isya kunhobokela, nunhobokiile nkyeni mwa Kilisiti kunongwa jinu, 11 ukuti Seetano alingatutola, paapo tubameenye fiijo ubukomu bwake.

Paali nkaaja akaa mu Tiloja

12 Po bo mfikile nkaaja akanywamu akaa mu Tiloja, kukulumbilila iNdumi iNunu ijaa Kilisiti, naalyagile ikifigo kiigwike, ukuti mbombe imbombo jaa Ntwa kula. 13 Leelo ngaali nu lutengaano mu ndumbula, paapo ugwamyitu ndwitiko Tiiti, akaali ukufika ni nongwa simo inunu ukufuma kamyinu. Po ndinkubalaga abandula baa kula, ndinkubuka kula kukiisu ikya Maketonija.

Ukutola ku maka agaa Kilisiti

14 Looli tunngwilege ulupi Kyala! Mwa Kilisiti ikutalongosya akabalilo koosa, bo ulwa ntoli uju ikubalongosya abandula aba abakolile mbwite. Kangi bo ulwa lumama ulununu ulu lukubalanila koosa, ikutapela uswe ukubalania

ubumanyi bwa Kilisiti mbujo boosa. ¹⁵ Namanga kwa Kyala tufwene na lumu ulununu ulu lukumfikisya Kilisiti ku bandu boosa, kuli aba bikupokigwa, kangi kuli aba bikusoba. ¹⁶ Kuli aba bikupokigwa, uluma ulu lununu, lukubapa ubumi. Looli kuli bala bikusoba, uluma ulu lubiibi, lukubapa ubufwe. Bule, alipo umundu gwesa uju abagiile ukubomba imbombo ijo? ¹⁷ Baliko abandu bingi abasyobi, aba balibikile iisyu lya Kyala ngati kandu kaa kulisya. Uwe telegeene nabo. Looli mwa Kilisiti tutumiigwe na Kyala, tukufumusya iisyu lya Kyala ku bwanalooli.

3

Ababombeli abaa lwitikano ulupa

¹ Kali mukwinogona ukuti twandile kangi ukwituufya? Himma, uwe tukaja bo abandu abangi, aba bikutwala kumyinu baakalata, ukwilingania muno bajiliile, pamo ukusuma kumyinu baakalata, abaa kutulingania muno tujiliile ku bandu abangi. ² Umwe jo kalata uju ikulingania muno tujiliile, uju asimbiigwe mu ndumbula syitu, uju abandu boosa babagiile ukubala na kusimanya isi tukubomba. ³ Mukunangisya ukuti umwe jo kalata ukufuma kwa Kilisiti. Kalata uju ikunangisya imbombo isi tubombile kumyinu. Akafwana na kalata uju asimbiigwe ni simbilo, looli asimbiigwe na Mbepo gwa Kyala umumi. Kangi mukaja bo kalata uju asimbiigwe pa mabwe, looli uju asimbiigwe mu ndumbula sya bandu.

⁴ Po tutikwilaamwa na panandi nkyeni mwa Kyala ndi isyo, kunongwa jaa isi atubombiile Kilisiti. ⁵ Tutikwinogona ukuti tubombile simo ku maka giitu, looli amaka aga gikufuma kwa Kyala gabombile syosa. ⁶ Umwene jo uju atupeele amaka agaa kuja babombeli abaa lwitikano ulupya,* ulu lutikufuma mu ndagilo isi silimo mmasimbo, looli lukufuma kwa Mbepo Mwikemo. Namanga amasimbo gaa ndagilo gikutwala ubufwe, looli Mbepo Mwikemo ikutwala ubuami.

Ubusisya bwa lwitikano ulupya

⁷ Indagilo sya Moose isi syasimbiigwe pa mabwe, syatwele ubufwe. Syaliisile nu busisya nu kulangala, mpaka aBanyaisilaili baatoliigwe ukunkeeta Moose kumaaso, paapo kwalangalaga fiijo, na paapo kaali kabalilo kapimba itolo.† Po linga imbombo jaa luko ulo jaaliisile nu busisya, ⁸ bule, imbombo jaa Mbepo Mwikemo jitikukindilila ukuja nu busisya? ⁹ Linga imbombo jila ijaa ndagilo, iji jaapelile abandu ukulongigwa jili nu busisya, po imbombo jaa Mbepo Mwikemo, iji jikupela abandu ukuja bagolofu nkyeni mwa Kyala, bule jitikukindilila ukuja nu busisya? ¹⁰ Ulwitikano lula ulwa kwanda lukaali nu busisya kangi, ukubufwanikisya nu busisya ubukulumba fiijo ubwa lwitikano ulupya, ubu bukindile ubusisya boosa. ¹¹ Linga aka kaakulupaga kaali nu

* **3:6** 3:6 Ulwitikano ulupya Bala iisya Ulwitikano ku isyakulingaania. † **3:7** 3:7 Bala kalata gwa Ukusooka 34:29-30.

büsisya bwake, po ubüsisya bwa aka kikujako bwila na bwila kikukindilila uküja nu büsisya.

¹² Paapo ulo lo lusubilo lwitu, tukubomba imbombo kisita kütüla. ¹³ Kangi tütükubomba bo ulwa Moose, ujü aaliikingile kumaaso ni kitambala, uküti aBanyaisilaili balingankeetaga bo ukulangala kukulogotela. ¹⁴ Looli amahala gaabo gaaliigaliigwe. Mpaka ulü, bo bikubala baakalata abaa ndagilo sya Moose, amahala gaabo gakingiigwe ni kitambala, bikütoligwa ukusyagania. Ikitambala kyabo kikaali ukusoosigwa, paapo Kilisiti mwene jo abagiile ukukisoosyapo ikitambala ikyo. ¹⁵ Nalooli mpaka ulü, bo bikubala baakalata abaa ndagilo sya Moose, indumbula syabo sikupikiliigwe, bikütoligwa ukusyagania. ¹⁶ Looli umundu ujü ikusanukila kü Ntwa, uNtwa ikansookesyapo ikitambala kyake. ¹⁷ Iisyü ilyo, “Ntwa,” kokuti, “Mbepo.” Apa alipo Mbepo gwa Ntwa pali nu bwabuke. ¹⁸ Po twesa, twe tukulangala ubüsisya bwa Ntwa, paapo atusoosiisyepo ikitambala kumaaso, tukwanduligwa uküti tufwane nagwe. Tukwanduka ukufuma mbüsisya, uküti tujege mbüsisya ubukulumba ubü bükindiliile, ubufuma kü Ntwa, ujü jo Mbepo.

4

Amaka gaa Kyala ntundu utwa mfu

¹ Po Kyala kü kibabiilisi kyake atupeele imbombo iji, tütikoonyoka amaka. ² Tukaanile loosa ukubomba kubütütu ingosya soni, ukubasyoba abandü nu kongania iisyü lya

Kyala ni sya butungulu. Looli tukujoba ubwanalooli pabwelu, ukuti abandũ boosa bamanye mu ndumbula syabo ukuti tukaja basyobi nkyeni mwa Kyala. ³ Looli linga iNdũmi iNunu iji tukufumusya jifisiigwe, jifisiigwe kwene kuli aba basobile. ⁴ Seetano, ujũ jo lyakyala lya pakiisu apa, abapũpeesye inyiinogono syabo abandũ aba batikummwitika Jesu, ukuti batoligwe ukulubona ulumuli lwa Ndũmi iNunu ijaa busisya bwa Kilisiti, ujũ jo kifwanikisyo ikya Kyala. ⁵ Namanga uswe tutikufumusya inongwa syitu, looli tukufumusya inongwa isya Jesu Kilisiti, ukuti jo Ntwa, nu kuti uswe tuli babombeli biinu ku njila jaa kumbombela Jesu. ⁶ Tukubomba bo ulo paapo Kyala, ujũ aatile, "Ulumuli lumulike mu ngiisi,"* jo ujũ ikumulika indumbula syitu, ukuti tubumanye ubusisya bwake ubũ bukulangala kumaaso kwa Jesu Kilisiti.

⁷ Pamopeene na isyo, amahala ago amakulumba gafwene bo ikyama iki kibiikiigwe mu ngumbe isya mfu. Po abandũ bikumanya ukuti amaka giitu agaa kubomba imbombo ijo, gatikufuma kumyitu, looli gikufuma kwa Kyala. ⁸ Tuli mbutolwe kuno na kuno, looli tutikutoligwa. Tukwilaamwa, looli tutikoonyoka amaka. ⁹ Abandũ bikutukaga, looli Kyala atikutuleka twibeene. Tukubigigwa, looli tutikugogigwa. ¹⁰ Amasiku goosa imibili gyitu gili mbutolwe ubwa kugogigwa, bo ula aagogiigwe Jesu, ukuti ubũmi bwa Jesu

* **4:6** 4:6 Bala kalata gwa Ubwandilo 1:3.

buboneke mmibili gyitu. ¹¹ Namanga uswe twe buumi, akabalilo koosa tuli mbutolwe ubwa kufwa, kanongwa jaa kubomba imbombo jaa Jesu, ukuti abandu babubone ubuumi bwa Jesu mmibili gyitu, nalinga imibili gyitu aagikufwa. ¹² Po uswe tuli mbutolwe ubwa kufwa, looli umwe mukakaba ubuumi.

¹³ Uswa nuuswe tummwitiike Kyala, bo ulwa mundu jula uju aajobile mwa Kalata uMwikemo, aatile, "Naalimmwitiike Kyala, fyobeene naajobile."† Bo lululo, uswe tummwitiike. Fyobeene tukajoba. ¹⁴ Po tukajoba pabwelu, paapo tumeenye ukuti Kyala uju aalinsyusiisye uNtwa Jesu, ikwisa kutusyusya uswe, ukuti na nuuswe tujege pamopeene nagwe. Kangi ikwisa kutubiika pamopeene na nuumwe nkyeni mmyake. ¹⁵ Ingubilo isi syosa isi tukwambilila sikubapa ukukabamo, ukuti iipyana Iya Kyala libafikile abandu abingi. Po bikunngwilaga ulupi fiijo Kyala, nu kukindilila ukummwimika.

Ubusisya bwa bwila na bwila

¹⁶ Po tutikoonyoka amaka, nalinga imibili gyitu gikukulupa, looli nkati mmyitu Kyala ikutupela ukujja bapya kukuti isiku. ¹⁷ Namanga ubutolwe bwitu bupepe, kangi bwa kabalilo akapimba itolo. Ubutolwe ubo, bukututendekesya ubusisya ubwa bwila na bwila, ubukulumba fiijo ukukinda ubutolwe bula. ¹⁸ Po tukufilulalila ifi fitikuboneka, fyomma ifi fikuboneka, paapo ifi fikuboneka fya kabalilo akapimba itolo, looli ifi fitikuboneka fya bwila na bwila.

† 4:13 4:13 Bala kalata gwa Isabali 116:10.

5

Ukuguulila imibili imipya ukufuma kwa Kyala

¹ Tameenye ukuti imibili gyitu kitembe kya kabalilo akapimba nkiisu muno. Looli bo kiisile kupanguka, Kyala ikwisa kutupa imibili imipya kumwanya, bo ulwa nyumba ijaa bwila na bwila, iji jikajengigwa na bandu. ² Namanga mbuumi ubu, indumbula syitu sikutaamigwa. Ndi ilyo tukanyonywa fiijo ukufwikigwa imibili imipya kumwanya, igi syo nyumba syitu imbya. ³ Kyala bo atufwikile, tutikwisa kujaga kisita mibili. ⁴ Bo tukaali tuli nkitembe iki ikya kabalilo akapimba, tukutaamigwa mu ndumbula syitu, tukufwikigwa ifitwalo ifisito. Tutikuti tukulonda kwene ukufuula umbili ugu gukufwa, looli tukulonda ukufwikigwa umbili ugu gutikufwa, ukuti umbili ugu gukufwa gumiligwe na ugu gutikufwa. ⁵ Kyala jo ujū atutendekekiisye isyo, atapeele Mbepo gwake, ukuti tumanye kisita kwilaamwa ukuti isyo sikwisa kuboneka.

⁶ Po akabalilo koosa, tutikwilaamwa. Kangi tameenye ukuti, akabalilo aka tuli ni mibili igi pakiisu apa, tuli kubutali nu Ntwa. ⁷ Tukwendela ndwitiko, somma ndi ifi fikuboneka. ⁸ Po tutikwilaamwa, kangi tukwaga kwali kununu ukuguleka umbili ugu, tukatugalege nu Ntwa. ⁹ Po leelo, tujē mbūjo ubu, pamo tulingaja mbūjo ubu, inyango jitu ko kankyela uNtwa. ¹⁰ Namanga uswe twesa tukwisa kwima nkyeni mwa Kilisiti, nu kulongigwa nagwe, ukuti kukuti mundu iise ambulile umfwalo ukukongana na

isi abombile pakiisu apa, sije nunu pamo sije mbiibi.

Ububombeli bwa kubafumukisya abandu isya kubafwania na Kyala

¹¹ Paapo tumeenye ukuntiila unTwa, po tukwikasya ukubapyelesya abandu ukati bammwitikege. Kyala atumeenye fiijo muno tajiiliile, na niine ngusubila ukati nuumwe mutumeenye fiijo. ¹² Tutikulonda ukwituufya kangi kumyinu, looli tukulonda ukubabwula isyo, ukati mwituukifye isi tukubabombela. Po mujege na masyu agaa kubaamula aba bikwituukifya isi babombile nkyeni mmbandũ, somma muno bajiliile mu ndumbula. ¹³ Linga abandu bikuti uswe tuli ni kigili, tuli nakyo mwene nkyeni mwa Kyala. Linga tuli na mahala, tuli nago kumyinu. ¹⁴ Ulagano lwa Kilisiti lukutulungosya na maka, namanga tumeenye ukati, umundu jumo aabafwiliile abandu boosa ukati bahobokeligwe ubutulonongwa bwabo. Kunongwa ijo ubundu bwabo ubwa ijolo bufwile pamopeene nagwe. ¹⁵ Aabafwiliile abandu boosa, ukati baleke ukwendela mbwigane bwabo, looli mbwigane bwa ujũ aabafwiliile nu kasyuka.

¹⁶ Po ukufuma akabalilo aka, tutikummbona umundu najumo bo muno abandu abaa nkiisu bikummbonela. Akabalilo kamo twankeetaga Kilisiti bo ulo, looli akabalilo aka tutikubomba bo ulo. ¹⁷ Umundu gwesa ujũ alungeene na Kilisiti, ikuja kipeligwa kipya. Isya ijolo sikindile. Keeta, siisile imbya! ¹⁸ Looli syosa

isyo sikufuma kwa Kyala, ujū atufwenie uswe nū mwene, ukwendela mwa Kilisiti. Uswe atupeele imbombo ijaa kubanangisya abandu injila jaa kubafwania nū mwene. ¹⁹ Kokuti Kyala, ukwendela mwa Kilisiti, aabafwenie abandu nū mwene, kisita kubala ubutulanongwa bwabo. Kangi Kyala atupeele uswe imbombo jaa kubafumukisya abandu isya kufwania uko.

²⁰ Po uswe tuli ni Ndami jaa Kilisiti. Kokuti, ukwendela mmyitu, Kyala ikubasisimikisya ukufwana nagwe. Fyobeene tukubasuma fiijo ku bulagili bwa Kilisiti ukuti, mufwane na Kyala.

²¹ Kilisiti akaali nū butulanongwa, looli Kyala aalimmbiikile ngati ntulanongwa, ukuti ku njila jaa kulungana na Kilisiti, tajege mbuliilanisi na Kyala mbugolofu bwake.

6

¹ Paapo tukubomba pamopeene na Kyala, tukubapyelesya ukuti iipyana lyake ili mwambiliile, mulingalisobesya. ² Namanga Kyala ikuti,

“Pakabalilo akanunu naakupiliike,

pi isiku lya bupoki naakutuulile.”*

Po nikubabwula umwe nikuti, akabalilo akanunu ko aka, iliisiku lya bupoki lyo ili!

Ukutaamigwa kwa Pauli bo ikubomba imbombo jaa Ntwa

³ Tutukubomba nakamo, aka kikufulasya mu ndumbula sya bandu, ukuti ububombeli bwitu bulingajobigwaga kabiibi. ⁴ Looli ndi syosa

* **6:2** 6:2 Bala kalata gwa Jeosaja 49:8.

tukwinangisya ukuti tuli babombeli baa Kyala. Tukwikasya fiijo mu ngabilo na mbatolwe ubwingi. ⁵ Akabalilo kamo tukukomigwa, tukupinyigwa mu nnyololo, tukoobeligwa, tukubomba imbombo ingafu, tukugona maaso, tukulinda ni njala. ⁶ Leelo tukubomba syosa isyo ku bugolofu, mbumanyi, mbutengamojo, mbooloolo, nkulongosigwa na Mbepo Mwikemo, ndugano ulusita busyobi, ⁷ kangi ku njila jaa kulumbilila indumi jaa nalooli, ku maka agaa Kyala. Ubugolofu kyo kilwilo kytu, iki tukukola mmaboko gutu ku kiiliilo na ku kiimama. ⁸ Uswa tukwikasya fiijo, abandwa batwimike pamo batufujule, batutuufye pamo batujobe kabiibi. Tukujobigwa ukuja batungulu, looli tukujoba isya bwanalooli. ⁹ Tukufwana tukaja bafumuke, looli tuli bafumuke fiijo. Tukufwana tafwile, looli tuli buumi. Tukomiigwe fiijo, looli tutikugogigwa. ¹⁰ Kangi tuli nu busulumanie, looli akabalilo koosa tuli nu lusekelo. Tuli balondo, looli bingi tubapeele ubukabi. Tukaja nafyo nafimo, looli tuli nu tundu toosa.

¹¹ Mwe Bakolinti umwe, tujobile na nuumwe kisita kufinda nakamo, kangi tujobile ku lugano ulukulumba. ¹² Uswa tukaleka ukubagana umwe, looli umwe mulekile ukutugana uswe. ¹³ Po ngujoba na nuumwe ngati ngujoba na baanangu, muje nu lugano fiijo bo muno tujiliile uswe.

Ubuliilanisi na bandu aba bakaja biitiki

¹⁴ Mulingajaga baliilanisi na bandu aba bakaja biitiki. Bule, ubugolofu nu butulanongwa fibagi-

ile ukuliilanila? Bule, ulumuli ni ngiisi fifwene itolo? ¹⁵ Bule, Kilisiti abagiile ukwitikana na Seetano? Bule, umwitiki abagiile ukujja ndiilanisi na ujja akaja mwitiki? ¹⁶ Bule, itempeli inyiikemo ijaa Kyala, jibagiile ukujja nu tundu utu tukaja twa Kyala? Namanga jo uswe twe tuli tempeli jaa Kyala uMuumi! Bo ulu Kyala aajobile ukuti, “Ngutugalaga mmyabo, nu kwenda pamopeene nabo.

Ngujaga ne Kyala gwabo, boope bikujaga bandu bangu.”†

¹⁷ Kunongwa ijo, uNtwa Kyala aatile, “Musookepo pakati pamyabo, mwipaagule!

Mulingakolaga akandu akanyali! Po na niine angubambilila.”‡

¹⁸ Kangi uNtwa Kyala uMwene maka goosa aatile, “Ngujaga Gwiseemwe, umwe mukujaga baanangu abanyambala, na baanangu abakiikulu.”§

7

¹ Bakundwe, paapo Kyala aafingile isyo syosa, twijeelusye, tulingaja nako nakamo aka kabagiile ukutunyasya umbili ni ndumbula, ukuti tujje biikemo fiijo ku njila jaa kuntiila Kyala.

Pauli ali nu lusekelo kunongwa jaa kipanga kya Kyala

† **6:16** 6:16 Bala kalata gwa Abanyaleebi 26:12; Jelemija 32:38; Eseyeli 37:27. ‡ **6:17** 6:17 Bala kalata gwa Jeesaaja 52:11.

§ **6:18** 6:18 Bala kalata gwa 2 Samweli 7:14.

² Mutwambilile mu ndumbula syinu! Tukatula inongwa ku mundu najamo. Tukamfulasya umundu najamo. Tukansyoba umundu najamo.

³ Ndikujoba amasya aga ukubalanga. Bo ulu njobile kubwandilo, umwe muli mu ndumbula syitu, taje pamopeene bo tuli ku buumi pamo tufwe pamopeene. ⁴ Bo ngujoba na nuumwe ngaja na lutende. Kangi ngwituukifya umwe. Muusubisiye fiijo. Na paapo tukufundigwa ni ngubilo inyingi, mumbelile ukuja na lusekelo ulunywamu.

⁵ Bo tufikile kula ku Maketonija twatoliigwe ukutuusya, paapo twali ni ngubilo koosakoosa. Panja kwali na bwite, nkati mu ndumbula syitu mwali na lutende. ⁶ Looli Kyala uju ikubasubisiya aba boonywike amaka mu ndumbula syabo, aatusubisiye ku njila ijaa kwisa kwa Tiiti. ⁷ Kukaja kokuti twasubisiigwe na Tiiti mwene, looli loope na lusubisiyo ulu aasubisiigwe na nuumwe. Aatupangiile muno musyukilwe ukumbona, ni sya busulumanie bwinu, na kwijwala kwinu kunongwa jangu. Isyo simbeliile ukusekela fiijo.

⁸ Nalinga naabapeliile ubusulumanie na kalata uju naabasimbiile, sitikummbaba. Nalinga syaliimbabile panandi kubwandilo, kalata ujo aabapeliile ubusulumanie kukabalilo akanandi itolo. ⁹ Looli lilino ndi na lusekelo. Bule, paapo mbatwaliile ubusulumanie? Himma! Looli paapo ubusulumanie bwinu babapelile ukupinduka ukufuma mbutulanongwa bwinu. Ubusulumanie bwinu bwali mbwigane bwa Kyala, uswe tukaabafuleesyepo ku njila

jojoosa. ¹⁰ Linga Kyala ikutupela ukuya na busulumanie, bukutupela ukupinduka na kupokigwa. Ubupokigwa ubo butikututwalila ubusulumanie. Looli ubusulumanie ubu bukufuma pakiisu apa bukutwala ubufwe. ¹¹ Keeta! Ubusulumanie ubo ubwa kufuma kwa Kyala, bubatwaliile ukukabamo fiijo. Po mukonyonywa fiijo ukwinosya, ukubukalalila ububiibi, ukummwimika Kyala, ukusyukwa, ukwijuula ukubomba isya bugolofu, na kuti uju asobile apeeligwege ulufundo ula lukalondigwa. Kunongwa iji munangiisye ukuti mukaja na kababye nakamo.

¹² Po nalinga naabasimbiile kalata jula, ngaasimbile kunongwa jaa mundu uju antuliile inongwa ujungi, pamo uju abombeliigwe ububiibi. Looli naalondaga musibone nkyeni mwa Kyala isi mukwijuula ukutubombela kanunu. ¹³ Kuli isyo mutusubiiisye. Pamopeene na isi, Tiiti aatuhobwisye na lusekelo, ula aali nalo ukukongana na muno mwalinsubikiisye. ¹⁴ Une naabatuufiifye fiijo nkyeni mmyake, na nuumwe mukangosya isoni. Syosa isi twababulaga syali sya nalooli. Bo sili, na isi twabatuufiifye umwe kwa Tiiti, syosa sinangiisye ukuya sya nalooli. ¹⁵ Ulugano lwa Tiiti kumyinu lukukindilila ukongelela, bo ikukumbuka ukwitika kwinu mwesa, na muno mwalimmwambiliile na lwimiko, kangi na latende. ¹⁶ Nikusekela fiijo, namanga ngubasubila loosa, mu mbombo syosa.

8

Ukubabwala abangi ni ndumbula inunu

¹ Po baamyitu ndwitiko, tukulonda ukubabwala isya ipyana lya Kyala ili bapeeliigwe abaa mfipanga fya Kyala ifya mu Maketonija.

² Abiitiki abo baali mu ngubilo ingali na mbulondo, looli baali nu lusekelo fiijo, ula lwabapelile ukaja bape fiijo ukusoosya utundu twabo.

³ Nikubabwala nikuti, baasoosiisye utundu twingi, ukukinda amaka gaabo. Kangi baasoosiisye ku bwigane bwabo, ⁴ nu kutupelesya ukuti, boope bajemo mu mbombo ijaa kubabwala abiitiki abalondo abaa ku Jelusalemu. ⁵ Baatalile taasi ukwininga ku Ntwa, po balinkwininga na kumyitu, ukukongana nu bwigane ubwa Kyala. Tukaasuubilaga bo ulo na panandi!

⁶ Tiiti aalyandile imbombo jaa kubungania ifi mwasangulaga bo iisile kumyinu. Po twalimpyeliisye ukuti iise abatuule ukujimaliisya imbombo ijo. ⁷ Umwe muli bakabi ndi syosa, ndwitiko, nkikungilwa ikya kulumbilila, mmahala, ukwijwala mu mbombo inunu syosa, pamopeene nu lugano lwinu kumyitu. Po mujege bakabi, na mu mbombo iji ijaa kubabwala abangi.

Ukaja ni ndumbula bo ijaa Jesu

⁸ Apa ngujoba isi, kukaja kokuti ngubafimbilisa, looli ngulonda ukulubona ulugano lwinu linga lwa nalooli, ku njila jaa kubafwanikisya na bangi. ⁹ Namanga umwe mumeenye muno uNtwa gwitw Jesu Kilisiti

aabapeele iipyana. Na paapo aali nkabi, aaliipelile ukujja ndondo kunongwa jinu, ukuti mbulondo bwake, muje bakabi.

¹⁰ Ikyinja iki kikindile, umwe mwali baa kwanda ukunangisya inyango jaa kusangula, na kwanda ukubomba bo ulu. Po une nguti kanunu, ¹¹ ukumaliisya imbombo iji mwalyandile. Bo ulu mwanonywaga ukwanda imbombo ijo, po ulu munyonywege ukumaliisya, ukukongana na maka giinu. ¹² Po linga umundu ikusoosya ku bwigane bwake, Kyala aikwambilila kukuti kandu aka umundu ujo abagiile ukusoosya. Atikumela ukuti ongelepo.

¹³ Inyango jitu, kukaja kokuti umwe mukubilwegwe ni kitwalo ikya kubatuula abangi, ukuti abeene kijege kipepe, looli ngulonda mufwanega itolo. ¹⁴ Akabalilo aka bo muli na tundu utwingi, mubatuulege aba bakaja nato, ukuti boope akabalilo aka bikwisa kaja nato twingi, bikwisa kubatuulaga umwe. Kuli isyo mukufwanaga, ¹⁵ bo muno sisimbiigwe mwa Kalata uMwikemo ukuti, “Uju aabungeenie twingi, akaali nato utwa kukindapo, uju aabungeenie tunandi akaalyagiilwe.”*

Tiiti na banine bikutumigwa ku Kolinti

¹⁶ Nguntuufya Kyala uju ampeele Tiiti indumbula iji ndi najo une, ijaa kubatuula umwe. ¹⁷ Namanga bo tunsuumile ukuti iise kumyinu, aaliitiike. Kukaja kokuti aaliitiike itolo, looli umwene ikunyonywa fiijo ukwisa ku

* **8:15** 8:15 Bala kalata gwa Ukusooka 16:18.

bwigane bwake jũũjo. ¹⁸ Pamopeene nagwe, tukantuma na gwamyitu ujungi, uju ifipanga fyosa ifya Kyala fikumpa ulwimiko mu mbombo ijaa kufumusya iNdumi iNunu. ¹⁹ Kangi ifipanga ifya Kyala finsalile ugwamyitu ujo, ukuti aje pamopeene na nuuswe bo tukutwala ku Jelusalemu ifya kubatuula abandu. Imbombo ijo, jikwisa kantuufya Kyala, kangi jikwisa kunangisya ukunyonywa kwitu ukubatuula abangi.

²⁰ Tukwenda injila pamopeene paapo tukiigana ukujobigwa ubabiibi na munda, kunongwa jaa kwimilila ukutwala utunda, utu abandu basoosiisye ku booloolo bwabo. ²¹ Inyango jitu, tukulonda ukubomba kanunu nkyeni mwa Kyala na nkyeni mmbandũ.

²² Po pamopeene na baa Tiiti, tukantuma ugwamyitu ujungi. Ujo tummbwene kaa kingi, ukuti ikunyonywa ukutuula. Kangi akabalilo aka ikunyonywa fiijo ukubatuula, paapo ikubasubila fiijo umwe. ²³ Po linga umunda ikulonda ukusyagania isya Tiiti, umwene mbombeli mwiniitu nkubabombela umwe. Kangi linga ikulonda ukusyagania isya baamyitu bala abangi, abeene batumiigwe ni fipanga fya Kyala, boope bikumpa ubusisya Kilisiti. ²⁴ Po leelo, mubanangisye abandu abo ulugano lwinu, ukuti abiitiki abaa mfipanga fyosa ifya Kyala basyaganie, ukuti mubagiisye ukutuufigwa na nuuswe.

Ƴbutuuli ku biitiki abaa ku Jelusalemu

¹ Po ndikulondigwa ukubasimbila isya butuuli bwinu ubo ku biitiki abaa ku Jelusalemu.

² Namanga njimeenye indumbula jinu ijaa kubatula abangi. Na niine nikwituukifya umwe ku biitiki abaa mu Maketonija ukuti, umwe mwe baa nkipanga kya Kyala ikya mu Akaja mwaliitendekiisye ukusoosya, ukufuma nkyinja iki kikindile. Ku ndumbula jinu ijaa kusoosya, mubapelile abandũ bingi pakati pamyabo ukunyonywa ukusoosya.

³ Po ngubatuma abaamyitũ aba, baa Tiiti. Ngubalonda mwitendekesye, bo muno naababũliile abiitiki abaa mu Maketonija, ukuti isi twabatuufyaga umwe, silingaboneka ukuti twabatuufyaga itolo. ⁴ Looli linga niisile uko pamopeene na Bamaketonija bamo, nu kwaga mukiitendekesya, apo bo mungosiisye isoni, kunongwa jaa lusũbilo lwitũ kumyinu. Kangi na nuumwe aamukusũka fiijo. ⁵ Jo nongwa iji naagile kanunu ukubasũma abaamyitũ aba, batalepo uko, ukuti batendekesye utundu utũ mwafingile ukusoosya. Apo bo musoosiisye ni ndumbula inyeelu, kisita kufimbilisigwa.

Ƴkusoosya iikemo ni ndumbula inyeelu

⁶ Mukumbukege ukuti, “Umundu ujũ ikusopa finandi, ikutondola finandi, kangi ujũ ikusopa fingi, ikutondola fingi.” ⁷ Umundu gwesa asoosyege ifi atumwile mu ndumbula jaake. Aleke ukusoosya ku busulumanie nu kufimbilisigwa, paapo Kyala annganile umundu ujũ ikusoosya ni ndumbula inyeelu. ⁸ Po Kyala

abagiile ukubiisusya iipyana lyake ku bwingi fiijo, ukuti akabalilo koosa mujege nu tundu toosa utu mukulonda mbuumi bwinu, kangi ukuti mujege na maka mingi agaa kubomba imbombo inunu. ⁹ Bo muno sisimbiigwe mwa Kalata uMwikemo ukuti,

“Asoosiisye ni ndumbula joosa, ukubapa abalondo,

ubugolofu bwake bwa bwila na bwila.”*

¹⁰ Kyala jo ujū ikumpa umundu imbeju isya kubyala, ni kisyeyye ikya kulya, aikongelapo ukubapa imbeju isya kubyala nu kusibaasya mu ngunda. Kokuti aikubapa nu kubongelapo indumbula ijaa booloolo. ¹¹ Ikubapaga ubukabi ndi syosa, ukuti mujege booloolo akabalilo koosa. Kuli isyo abandu bikuntuufyaga Kyala kunongwa jaa tundu utu mukasoosya ukwendela kumyitu.

¹² Imbombo iji mukubomba, jitikubatuulaga beene itolo abiiitiki aba baagiilwe, looli jikubapelaga abandu bingi ukunngwila ulupi fiijo Kyala. ¹³ Imbombo ijo jikunangisyaga ubupe bwinu, kangi abandu bikuntuufyaga Kyala paapo umwe mukujitika iNdami iNunu ijaa Kilisiti nu kukonga imanyisyo syake. Kangi bikuntuufyaga Kyala kunongwa jaa booloolo bwinu ubwa buliilanisi nabo, na bangi boosa. ¹⁴ Po bikubasuumilaga kwa Kyala ni ndumbula joosa, kunongwa jaa ipyana ili abapeele umwe ku bwingi. ¹⁵ Kyala atuufigwege fiijo ku

* **9:9** 9:9 Bala kalata gwa Isabuli 112:9.

kikungilwa kyake ikikulumba, iki kisikindile induufyo syosa!

10

Pauli ikubaamula aba bikummwilaamwa

¹ Po une Pauli, ne mukuti ndi mooloolo bo ndi pamopeene na nuumwe, looli ndi nkali bo ndi pabutali na nuumwe, ngubapyelesya ku lwijiisyo na ku booloolo bwa Kilisiti, mumbilikisyege! ² Bamo pakati pamyinu bikuti uswe tukukonga isya pakiisu apa. Bo niisile kumyinu, anguja nkali fiijo ku bandu bala, looli muleke ukumbiika ukuja nkali kumyinu koope.

³ Nalinga tukutugala pakiisu apa, tutikulwa ubwite bo ulwa bandu abaa pakiisu. ⁴ Hfilwilo ifi tukulwila ubwite ubo fikaja fya pakiisu, looli fili na maka agaa kufuma kwa Kyala, fikoonanga amalinga goosa agaa ndugu. ⁵ Tukoonanga amasyu goosa agaa matingo aga gikubasigila abandu ukummanya Kyala. Kangi tukusikola inyiinogono syosa ukuti sintiilege Kilisiti. ⁶ Bo munangiisye pabwelu ukuti mukubwimika ubulongosi bwitu, aatukwitendekesya ukubalanga aba bikwendelela ukukaana.

⁷ Namukeete ifi fili nkyeni mmyinu.* Umundu gwesa uju ikwibona ukuti umwene gwa Kilisiti, asyaganiege ukuti na nuuswe tali bandu baa Kilisiti bo umwene. ⁸ Pamo ngiisiisepo panandi ukwituufya isya bulagili ubu uNtwa

* **10:7** 10:7 Namukeete ifi fili nkyeni mmyinu Abimbi abangi bikusanusya amasyu aga ukuti, Umwe mukukeeta syene isya panja.

Jesu atupeele, poope ndikuja ni soni, namanga aatupeele ubulagili ubo ukuti tubakasye, somma ukuboonanga. ⁹ Ngabingilila ukubatiilisia na baakalata aba ngubasimbila. ¹⁰ Paapo bamo bikuti, “Baakalata baa Pauli bali na masyu amakali, kangi masito. Looli bo ali na nuuswe atikuja na maka, kangi amasyu gaake gaa itolo.” ¹¹ Po umundu ujū ikujoba bo ulo, asyaganiege ukuti isi tukubasimbila bo tūli kubutali, syo isi aatukusibombaga bo tūli na nuumwe.

Ukwituufya ku mbombo jaa Ntwa

¹² Tūtikwinogona ukwibiika pamo ukwifwanikisya na bandu bala aba bikwituufya. Bakonyofu bala! Bikwifwanikisya nu kwipima ni fipimilo fyabo abeene. ¹³ Aatūtikwituufya ku mbombo isi babombile abandū abangi, looli tubagiisye ukwituufya ku mbombo isi atupeele Kyala ukusibomba. Imbombo iji jifikile na kumyinu. ¹⁴ Nalooli, twali jo uswe twe twali baa kwanda ukubatwalila umwe iNdumi iNunu ijaa Kilisiti. Linga sikaali bo ulo, amasyu giitu aga, ngali gaa kwituufya fiijo. ¹⁵ Kangi tūtikwituufya ku mbombo isya bandu abangi, isi uswe tukaasibombile. Looli tukusuubila ukuti bo ulwitiko lwinu lukongelela ukukula, po imbombo jitu pakati pamyinu jikongelelaga fiijo. ¹⁶ Apo po aatukufumusyaga iNdumi iNunu mfiisu ifingi, kuno indumi ijo jikafumusigwa. Namanga tūkiigana ukwituufya ku mbombo iji jibombiigwe kuno apeeliigwe umundu ujūngi.

¹⁷ Kalata uMwikemo ikuti,
 “Umundu gwesa ujū ikwituufya,

iituukifyege mu Ntwa.”†

18 Umundu ujū uNtwa Jesu ikummwitikisya, akaja jo jūla ikwituufya, looli ujū ikatuufigwa nū Ntwa.

11

Abandu aba bikulumbilila isya butungulu

1 Ngubasuma mufise ilyojo, nalinga ngujoba ngati ndi nkonyofu. Ngubasuma mufise ilyojo! 2 Une mbaganile fiijo, bo ulu Kyala abaganile, namanga muli bo ulwa ndindwana ujū akamanyamo siku unnyambala, ujū naalimmwitikiisye ukwegigwa nū nnyambala jumojwene, ujū jo Kilisiti. 3 Looli lilino ngutiila ukuti, bo ulwa Efwa muno aasyobiigwe ni njoka jila ingomu, na nuumwe mulingiisa kasyobigwa, ukubuleka ubugolofu nū lugano lwinu ulwa nalooli kwa Kilisiti. 4 Ngujoba bo ulo paapo umwe muli bengo ukummwambilila umundu ujū ikwisa kukumfumusya Jesu ujungi, ujū uswe tukaalimfumwisye. Kangi muli bengo ukummwambilila mbepo ujungi, pamo indami ijingi, ifi mukaalyambiliile ukufuma kumyitu.

5 Une kukaja kokuti ndi nnandi ukubakinda aba bikwibona ukaja, “Batumigwa bakulumba.”* 6 Nalinga sya nalooli ukuti une ngamanya ukulumbilila kanunu nkyeni nkilundilo ikya bandu, poope ngaagilwa ubumanyi. Nnangiisye isyo kumyinu akabalilo koosa ku njila syosa.

† 10:17 10:17 Bala kalata gwa Jelemija 9:24.

* 11:5 11:5

Abatumigwa Bala ku Isyakulingaania.

Abandu abo batumigwa baa butungulu

⁷ Naaliijiisiisye ukufumusya kumyinu iNdumi iNunu ijaa Kyala, kisita kuhombigwa, ukuti umwe mwiniligwe. Bule, naabombile kabi-ibi ukwijiisya? ⁸ Bo ngubomba imbombo kumyinu, nambililaga ifya butuuli ukufuma ku fipanga ifya Kyala ifingi. Naafwene ngati ngupoka utundu twabo, ukuti mbatuule umwe. ⁹ Akabalilo ako linga naagiilwe fimo, ngaa-bataamiisyepo, paapo abiitiki biiniitu abaa mu Maketonija baalimbeele ifi ngulonda. Niiti-imagi ukuti ndingabatwalila umwe ubatolwe na panandi. Ndikwisa kubatwalilamo ubatolwe siku! ¹⁰ Ubwanalooli bwa Kilisiti bo ulu bujiliile nkati mmyangu, akajako umundu najamo ntwa ja toosa utwa mu Akaja, ujua abagi-ile ukusigila ukwituufya kuli isi. ¹¹ Bule, ngabagana? Kyala ameenye ukuti mbaganile.

¹² Ngwendelelaga ukubomba bo ulu ngubomba lilino, ukuti abatumigwa abo aba bikwibona bakulumba, batoligwe ifya kwituukifya ukuti bikubomba imbombo bo ijiitu. ¹³ Abandu bo abo, batumigwa baa butungulu, bo babombeli abasyobi, bikwibiika ukaja ngati batumigwa baa Kilisiti. ¹⁴ Ndi isyo tutikuswiga, paapo joope Seetano ikwibiika ngati gwandumi gwa lumuli. ¹⁵ Po leelo tutikuswiga apa boope ababombeli baake bikwibiika ukaja ngati babombeli bagolofu. Ummalikisyo gwabo aabikwambilila isi sifwene ni mbombo jaabo.

Pauli ikwituufya ku ngubilo syake

16 Ngujoba kangi, umundu alingiinogonaga ukuti une ndi nkonyofu! Looli nalinga mukujoba ukuti ndi nkonyofu, muundeke nje nkonyofu, mumbilikisye, ukuti na niine niitu-ufyepo panandi. 17 Amasyu aga ndi pakujoba uwa, gakaja go aga aaliindagiile uNtwa Jesu, looli ukwituufya uku ngujoba bo uwa mundu unkonyofu itolo. 18 Paapo bingi bikwituufya ku mbombo sya pakiisu apa, na niine ngwituufya. 19 Umwe mukwibona muli na mahala! Looli mutikupaasya, mukubiitikila aband u abakonyofu! 20 Nalooli, mukuumiilila nu kummwitika nu mundu uju ikubabiika mbutumwa! Pamo umundu uju ikubiibila nu kupoka utundu twinu! Pamo umundu uju ikukabilamo kumyinu, pamo ikubatuka nu kubakoma kumaaso! 21 Sikungola isoni ukujoba, po uswe twali boonywa ukubomba isyo!

Paali ikwituufya ku boonywa bwake

Linga aliko umundu uju abagiisye ukwituufya ndi simo, na niine mbagiisye ukwituufya, looli ndi pakujoba bo uwa mundu unkonyofu muno ikujobela! 22 Bule, abeene bikwituufya ukuti Bahibuli? Na niine ndi Nhibuli. Bule, bikwituufya ukuti Banyaisilaili? Na niine ndi Mwisilaili. Bule, bikwituufya ukuti baa ndujungu lwa Abulahamu? Na niine ndi gwa ndujungu lwa Abulahamu. 23 Bule, abeene bikwituufya ukuti babombeli baa Kilisiti? Une ndi mbombeli gwa Kilisiti ukubakinda abeene! Une niijuulile ukubomba imbombo ukukindapo. Mbinyi-igwemo mu nnyololo kaa kingi ukukindapo.

Ngomiigwemo fiijo, kangi ndi mbutolwe ubwa kufwa kaa kingi, ukubakinda abeene. Ulu ndi pakujoba bo ulwa mundu ugwa kigili.

²⁴ Kahaano ngomiigwe ifingoti 39 na Bajuuta. ²⁵ Katatu ngomiigwe ingili sya Balooma, kamo nduunyiigwe na mabwe, katatu isitima jinyoonangikiile, kangi iisiku limo naakupwike, naali mu nyanja pakilo na pamuusi. ²⁶ Injila nyingi isi nendaga, naali mbutolwe ubwa kuloboka inyisi isi siiswile, mbutolwe ubwa kukoligwa ni minyambuta, mbutolwe ubwa kukomigwa na Bajuuta biinangu, nu kukomigwa na bapanja. Naali mbutolwe ntwaya na mmatengele, mbutolwe ubwa kwenda mu nyanja, na mbutolwe ubwa ngubilo isya bandu aba bikwibiika ukuya biitiki biiniitu. ²⁷ Mbombile imbombo ingafu nu kutaamigwa, kingi ngonile maaso, ndaamiigwe ni njala ni kyamilwa, kaa kingi ngalyamo ifindu, nu kutugala mu mbepo kisita myenda. ²⁸ Pamopeene na isyo syosa, kukuti isiku ndi ni kitwalo ikya kwimilila ifipanga fya Kyala fyosa. ²⁹ Linga umundu gwesa moonywa, niine ngwipilika uboonywa. Linga jumo bampelile ukugwila mbutulanongwa, une ngusulumania.

³⁰ Linga ngulondigwa ukwituufya, ngwituufya ku boonywa bwangu. ³¹ Kyala, uGwise gwa Ntwa Jesu, uja ikulondigwa ukutuufigwa bwila na bwila, ameenye ukuti ndikujoba isya butungulu. ³² Akabalilo aka naali mu Ndamasika, undongosi uja aasaliigwe nu malafyale Aleta, aabikile abalindilili mfipata fya kaaja, ukuti bangole.

³³ Leelo abandũ bamo baaliisulwisye nkiibo pi itũũlo lya imato, naaponile ukukoligwa.†

12

Ifisetuka nũ boonywa bwa Paũli

¹ Ngũlondigwa ukwituufya, nalinga ndikukaba nafimo. Po ulũ mpaka njobe isya fisetuka* na isi aasetũliile uNtwa Jesu. ² Nũmmeenye umundũ jũmo, uNkilisiti,† uju ifyinja kalongo na fina fikindile, aafyũsiigwe mpaka kũmwanya fiijo.‡ Ngamanya ukuti aali mu mbili, pamo akaali mu mbili bo ikufyũsigwa, looli Kyala jo uju ameenye. ³⁻⁴ Mmeenye ukuti umundũ ujo aafyũsiigwe mpaka ukufika kũla kũmwanya, looli ngamanya ukuti pamo aafyũsiigwe bo aali mu mbili, pamo akaali mu mbili, looli Kyala jo uju ameenye. Uko alinkũpilika amasyũ agaa kũswigisya fiijo, aga umundũ akiitikisigwa ukũgajoba. ⁵ Po ulũ angwituufya kũ mundũ ujo, leelo ndikwituufya muno njũliile une, looli ngwituufya kũ boonywa bwangũ. ⁶ Poope nalinga naalondaga ukwituufya, ngaajaga nkonyofu, paapo ngali ngũjoba isya bwanalooli. Looli ngwisigila ukwituufya, ukuti umundũ angaanyi-inogonelaga ukũkinda isi ngũbomba na isi ngũjoba.

† **11:33** 11:32-33 Bala kalata gwa Imbombo sya Batũmigwa 9:23-25. * **12:1** 12:1 Isya fisetuka Bala iisya Ubusetuka kũ Isyakũlingaania. † **12:2** 12:2 Nũmmeenye umundũ jũmo, uNkilisiti Apa Paũli ikwijoba, leelo ikũjoba ngati ikũnnjoba umundũ ujuũgi. ‡ **12:2** 12:2 Kũmwanya fiijo NKigiliki bikuti Kũmwanya ukwa batata.

⁷ Leelo ukuti ndingiituufyaga fiijo kunongwa jaa isi uNtwa Jesu aasetuliile, naapeeliigwe ingubilo ingali mu mbili gwangu, bo ulwa mwifwa. Gufwene bo ulwa gwandumi gwa Seetano uju atumiigwe, ukuti angufyege na kuusigila ukukindilila ukwituufya. ⁸ Katatu naapyeliisye ku Ntwa, ukuti amboke mu ngubilo isyo. ⁹ Looli umwene aaliimbwulile aatile, "Iipyana lyangu likufwene, namanga mboonywa mo muno amaka gangu gikuboneka." Ndi ilyo, ngwituufyaga na kubusekela fiijo uboonywa bwangu, ukuti amaka gaa Kilisiti gaboneke mmyangu. ¹⁰ Po ndi na lusekelo mboonywa bwangu, nkutukigwa, mbatolwe, mu ngubilo na kutaamigwa, kunongwa jaa Kilisiti. Namanga apa nguja moonywa, po apa nguja na maka.

Pauli ikwijaaja kunongwa jaa kajilo akaa Bakolinti

¹¹ Ngujoba ngati ndi nkonyofu, looli umwe muufimbiliisye ukubomba bo ulo. Jo umwe mwalondigwaga ukunduufya une, paapo nalinga nguboneka ukusita kubagisya, une ngaja ntumigwa unnandi ukubakinda bala, aba mukuti bo, "Batumigwa abakulumba." ¹² Bo ndi kumyinu, naalyumiiliile ukubomba ifika ni fimanyilo ifi fikunangisya ukuti une ndi ntumigwa gwa bwanalooli. ¹³ Namanga fyo filiku ifi mwalyagiilwe ukukinda ifipanga fya Kyala ifingi? Kaaliko akandu kamokeene itolo aka mwalyagiilwe, akaa kuuhomba umfwalo gwangu! Ndaga fiijo ku batolwe ubu! Muuswege!

14 Ulu ngwitendekesya ukwisa kumyinu ulwa butatu, ndikwisa kubatimbikilaga. Ndikulonda ifyinu, looli ngubalonda umwe. Abaana batikulondigwa ukubabikila utundu abapaapi baabo, looli abapaapi bikulondigwa ukubabikila icyuma abaanaabo. 15 Une ndi nu lusekelo ukusoosya utundu twangu toosa, kangu ukwininga, ukubatwula umwe. Linga ngukisya ukubagana bo ulu, kali, ulugano lwinu lukunaganikaga?

16 Nalinga mwitiike ukuti ngaabatimbikiile, leelo bamo pakati pamyinu bikuti, "Pauli nkomu, abaagile ku busyobi." 17 Bule, naalintumilepo umundu kumyinu ujya aabasyobile nu kwega utundu twinu? Akajako najumo!

18 Naalinkaseenie Tiiti ukwisa kumyinu, pamopeene nu gwamyitu ujungu jula. Bule, Tiiti aalyegilepo kamo kumyinu? Keeta une nu mwene twi ndumbula jimojeene mu mbombo, kangu akajilo kiitu kali kamokeene!

19 Pamo mukwinogona ukuti akabalilo koosa aka, tukwinosya. Himma! Tukujoba nkyeni mwa Kyala, twe banda baa Kilisiti. Bakundwe, syosa isi tukubomba sya kubatwula umwe. 20 Ngupaasya bo mfikile kumyinu, ukubaaga na kajiilo aka ngakagana une. Kangu akajilo kangu katikwisa kubahobosya umwe. Ngupaasya ukubaaga nu bwite, ubwafi, ilyojo nu kusita kupaasya abangi. Aakukuja nu kutungulupilanila, ukuheehana, amatingo nu kutapukana. 21 Kangu ngupaasya ukuti bo mfikile kumyinu, Kyala gwangu aikuswasya nkyeni mmyinu. Ngwisa kusulumania

ukubaaga abandũ bingi pakati pamyĩnu aba baabombile ubutulanongwa kubwandilo, bakasũma uluhobokelo. Bakaali bali na kajiilo akabiibi akaa bulogwe ni finyonyo ifibiibi ifi baabombaga.

13

Isya kumaliikisya ukubasoka

¹ Ulu lukujaga lwa batatu ukwisako kumyĩnu. Kalata uMwikemo ikuti, “Bajepo abakeeti babili pamo batatu abaa kasisimikisya kukuti kandũ.”*

² Po bo ndi kumyĩnu ulwa babili, naabasokile mwesa, ukuti mubuleke ubutulanongwa bwinu, fiijo aba bendelelaga na kajiilo kaabo akabiibi. Ulu bo ndi kubutali, ngubasoka kangi. Bo mfikile kumyĩnu, ndikwisa kubapaakisya abandũ bala. ³ Mukulonda ikimanyilo ikya Kilisiti ukujoba ukwendela mmyangu. Po isi mbombile kikuja kimanyilo. Kilisiti akaja moonywa kumyĩnu, looli ali na maka fiijo pakati pamyĩnu. ⁴ Kilisiti aali moonywa bo ikukomelelwa pa kikohekano, looli akabalilo aka mũmi mmaka gaa Kyala. Bubũbo na nuuswe tali boonywa mwa Kilisiti, looli mmaka gaa Kyala tukujaga mũmi pamopeene na Kilisiti, ukuti tubabombelege.

⁵ Po amwijeeneesye jujuumwe, ukuti mumanye linga ulwitiko lwinu lwa nalooli. Mwijeeneesye kanunu. Bule, mukamanya ukuti Jesu Kilisiti alimo nkati mmyĩnu? Linga

* **13:1** 13:1 Bala kalata gwa Ukukumbuka Ingomeesyo 19:15.

akaja nkati mmyinu, po mutoliigwe. ⁶ Looli ngusubila ukuti umwe aamukasyagania ukuti uswe tukatoligwa. ⁷ Tukunsuuma Kyala ukuti mulingabombapo ubutulanongwa nabamo. Kukaja kokuti tukulonda ukuboneka ukuja bandu baa kwimikigwa, looli tukulonda umwe mubombege syene inunu, nalinga abandu abangi bikwinogona ukuti tutoliigwe. ⁸ Namanga tukaja na maka agaa kubusigila ubwanalooli, looli ukubulwila. ⁹ Tukuhoboka bo muli na maka, nalinga uswe tuli boonywa. Tukunsuuma Kyala abatule, mukake ndwitiko. ¹⁰ Ngubasimbila amasyu aga akabalilo aka, bo ngaali ukwisa, ukuti bo mfikile kumyinu, ndingasyaga isya kambela ukuja nkali. UNtwa Jesu ambeele ubulagili ubu, ukubajenga ndwitiko, somma ukubagwisya.

Amasyu agaa kulagana

¹¹ Po baamyitu, musekelege. Mwime kanunu, amasyu gangu gabakasyege, mujege kandu kamokeene, mujege nu lutengaano. Po Kyala ugwa lugano nu lutengaano ikujaga pamopeene na nuumwe. ¹² Namuponaniege ku lugano lwa Kilisiti. ¹³ Abiitiki boosa aba bali pamopeene na nuuswe, bikubaponia. ¹⁴ Hliipyana lya Ntwa Jesu Kilisiti nu lugano lwa Kyala, nu buliilanisi bwa Mbepo Mwikemo, fijege pamopeene na nuumwe mwesa.

Ulwikano Ulupya
Nyakyusa-Ngonde: Ulwikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

14ff4521-53e4-562c-aacb-6f4faf55a6c8